



N°1986
Entrée le 27.02.2025
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 28.02.2025
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 27/02/2025

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Bildung, Kanner a Jugend weiderzeleeden.

Déi aktuell Schoulzäiten am Fundamental, wou d'Kanner u verschiddenen Deeg no enger laanger Mëttespaus nach emol d'Schoulbänk mussen drécken, brénge vill Nodeeler fir d'Kanner, d'Elteren an d'Personal mat sech, grad a Gemengen, wou aktuell ee Mangel u Betreuingsplazen ass.

Eng Upassung vun de Schoulzäiten, wou d'Schoulzäiten all Dag nämmlecht sinn (z.B. 8h00 bis 13h00 oder 7h00 bis 12h00) kéint bei de Kanner de Stress reduzéieren, deen de Wiessel Schoul-Maison Relais-Schoul mat sech bréngt. Den Elteren, déi mi-temps schaffen, géif dat erlaben, Mëttes méi Zäit mat hire Kanner ze verbréngen a fir d'Personal an de Maisons Relaise géif et de Planning méi einfach maachen.

Weider Virdeeler vun neie Schoulzäite wieren am Transport bemierkbar duerch den Impakt op d'Stousszäiten, mee och op déi wirtschaftlech Attraktivitéit vu Lëtzebuerg, wann d'Beruffsliewen an d'Familljeliewen an ee bessert Equiliber kommen. Och Kultur a Bénévolat kéinte vu méi gereegelten Auerzäite profitéieren.

Am Koalitiounsaccord ass näischt Konkretes zu den Horairen an de Schoulen ze fannen.

An deem Zesammenhang wéilt ech dem Minister dës Fro stellen:

1. Wéi eng Positioun huet dës Regierung zu der Ännerung vun de Schoulzäiten?
Verschléisst si sech enger Upassung vun neie Schoulzäiten oder sicht si hei, zesumme mat de Leit um Terrain, no alternative Modeller?

Mat déiwem Respekt,

GOERGEN Marc
Deputéierten



www.piraten.lu



www.piraten.lu



Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 1986 vum honorabelen Deputéierte Marc Goergen

Nieft dem traditionellen Horaire vun den ëffentleche Grondschoole goufen an de leschte Joren och eng ganz Rei alternativ Horairë vun ënnerschiddleche Gemengen a Schoulen an Zesummenaarbecht mat de Regionaldirektiounen entwéckelt, woubäi si op Ufro hi vum zoustännegen Departement vu mengem Ministère begleet goufen (z. B. Kannercampus Belval).

D'Basis vum Opstelle vun engem neien Horaire sollt ëmmer den Dialog tëscht alle concernéierten Acteure sinn (dem Schoulpersonal, den Elteren, an der Gemeng). Dëst ass wichteg, fir den neien Horaire och de lokale Begebenheeten, wéi beispillsweis den Infrastrukturen an der Méiglechkeet vun enger Upassung vum Schoultransport, adaptéieren ze kënnen. Dës lokal Constraintë sinn och de Grond dofir, wéisou de schouleschen Horaire als Deel vun der Schoulorganisatioun an d'Zoustännegkeet vun de Gemenge fält, déi dann zur Approbatioun dem Educatiounsminister virgeluecht gëtt.

Mäi Ministère ass am Zesammenhang mat der Entwécklung vun neien Horairen ëmmer diskussionsbereet an oppe fir Proposen. Allerdéngs ass et wichteg, datt hei op d'mannst zwou Viraussetzungen duerch den neien Horaire erfëllt ginn. Zum enge muss d'Unzuel vun de wéchentleche Schoulstonnen de reglementaresche Virgaben¹ entsprechen. Zum aneren ass et aus ënnerschiddleche Grënn wichteg, fir eng Reprise vun de Coursen no enger längerer Mëttespau ze assuréieren.

De Moie vun de Kanner dierf net ze vill chargéiert ginn an esou ass dovunner ofzeroden, si moies während fënnf Stonnen oder gegebenefalls nach méi laang ouni gréisser Paus a Léierprozesser ze setzen. Bei der Ausaarbechtung vum Horaire muss een zousätzlech zu der renger Schoulzäit dann och nach den Transport tëschent dem Doheem an der Schoul mat consideréieren. Een ze laange Moien huet ënnert anerem een negativen Afloss op d'Konzentratioun an d'Opnamefäegkeet vun de Kanner an doduerch och op d'Léieren an d'Entwécklung vun hire Kompetenzen. Zousätzlech kann d'Middegkeet vun de Kanner och d'Entwécklung vu Konfliktsituatiounen an der Schoul, doheem oder an der Structure d'éducation et d'accueil (SEA) verstärken. Dës Situatioun riskéiert sech ze verschlimmern, wann d'Schüler net d'Méiglechkeet hunn, an enger Paus während engem laange Moien eng gesond an equilibréiert Collatioun tëscht dem Moies- an dem Mëttesiessen zou sech ze huelen. En Horaire, deen d'Verdeelung vun deene 26 Schoulstonnen am Cycle 1 respektiv deenen 28 Schoulstonnen an de Cyclen 2-4 reng op de Moienter géif virgesinn, riskéiert deemno, net de Kapazitéiten an der Konzentratiounsfäegkeet vun de Schüler Rechnung ze droen.

Zousätzlech sollt de Schoulhoraire och een Outil sinn, fir weider zur Chancégerechtheet bäizedroen. Esou geet e groussen Deel vun den Eltere Vollzäit schaffen a si misste bei engem Horaire, deen nëmme moies Schoulstonne virgesäit, eng weider Betreierung fir den Nomëtten organiséieren. Sécherlech hunn eng ganz Rei Kanner op engem fräie Mëtten dank der diversifizierter Offer an der non-formaler Bildung een animéierte Programm. Vu datt dësen sech op fräiwëlleger Basis zesummestellt, riskéieren

¹ Annexe 3 vum *Règlement grand-ducal modifié du 11 août 2011 fixant le plan d'études pour les quatre cycles de l'enseignement fondamental*

anerer bei engem Horaire, wou reng moies Schoul ass, ganz fréi am Dag sech eventuell selwer iwwerlooss ze sinn a vill Zäit virun engem Ecran ze verbréngen. Eng Reprise am Nomëtten erlaabt et de Kanner deemno, a Rou zu Mëtten ze iessen, gegebenefalls nach enger Sports- oder Beweegungsaktivitéit, déi vun enger non-formaler Bildungsstruktur oder der LASEP ugebuede gëtt, nozegoen an duerno mat frëscher Energie nach eng Kéier an d'Schoul ze goen.

En Horaire, dee schonn um 7 Auer ufänkt, géing heinieft och op organisatorescher Säit Problemer opwerfen. Esou misst ee groussen Deel vun de Kanner hei sécher scho géint 6 Auer opstoen, fir sech um 6:30 Auer mam Schoultransport op de Wee an d'Schoul ze maachen, fir matzäiten an hirem Kllassesall kënnen ze sinn. Wëssenschaftlech Studie² beleeën, datt ee Kand vun 3-5 Joer 10-13 Stonnen an ee Kand vu 6-13 Joer 9-11 Stonnen Schlof brauchen. Muss ee Kand also um 6 Auer moies opstoen, da riskéiert et, a Funktioun vum Alter an de Schlofgewunnechten, extrem fréi mussen an d'Bett ze goen. Och dëst ass mam Alldag vu ville Famillen net ze vereinbaren. Nieft dem fréie Start moies an der Famill stellt och d'Ëmorganisatioun vum Schoultransport an d'Assurérieure vun enger Surveillance vun de Kanner an der Schoul virum Ufank vun de Coursen ee Probleem duer. Dës Weidere riskéiert dee Moment och d'Zäit tëschent dem Moies- a Mëttesiessen nach méi laang ze sinn, wat negativ Auswierkungen op d'Konzentratiounsfäegkeete vun de Schüler huet, déi wéi virdu schonn uginn, duerch eng feelend equilibréiert Collatioun an der Paus riskéieren, verstärkt ze ginn.

Lëtzebuerg, den 28. Mäerz 2025

De Minister fir Educatioun,
Kanner a Jugend

(s.) Claude MEISCH

² Ënnert anerem: M. Hirshkowitz, K. Whiton, S.M. Albert, et al.(2015): National Sleep Foundation's sleep time duration recommendations: methodology and results summary